

敕修兩浙海塘通志

勅修兩浙海塘通志卷十四

潮汐

海水晝夜兩潮多暗長浙屬之嘉寧溫台各郡類然獨海寧之尖山與南岸紹興諸山一東激起潮頭雪浪銀濤排牆而進至龕赭二山又加一東而錢塘之潮遂爲巨觀然江水順下海潮逆流強弱不相敵江水折而西行而兩旁回溜之搜刷非長椿巨石不能抵禦此各府之塘皆重塘身而杭紹兩府之塘尤重塘根也志潮汐

水經注 錢塘縣東有定已諸山皆西臨浙江水流於

兩山之間江川急濬兼濤水晝夜再來來應時刻

常以月晦及望尤大至二月八月最高峨峨二丈

有餘吳越春秋以爲子胥文種之神也昔子胥死

於吳而浮尸於江吳人憐之立祠於江上名曰胥

山文種忠於越而伏劍於山陰越人哀之葬於重

山文種旣葬子胥從海上負種俱去游夫江海故

渚水之前揚波者伍子胥後重水者大夫種

越絕書

死之後吳王聞以爲妖言甚咎子胥王使人捐於  
大江口勇士執之乃有遺響發憤馳騰氣若奔馬

威凌萬物歸神大海彷彿之間音兆常在後世稱述蓋子胥水仙也王充論衡傳書言吳王夫差殺伍子胥煮之於鑊乃以鴟夷囊投之於江子胥志恨驅水爲濤以溺殺人今時會稽丹徒大江錢塘浙江皆立子胥之廟蓋欲慰其恨心止其猛濤也夫言吳王殺子胥投之於江實也言其恨志驅水爲濤者虛也屈原懷恨自投湘江湘江不爲濤申徒狄蹈河而死河水不爲濤世人必曰屈原申徒狄不能勇猛力怒不如子胥且投於江中何江也有丹徒大江有錢塘浙江有吳通陵江或言投於丹徒大江無濤欲言投於錢塘浙江浙江山陰江上虞江皆有濤三江有濤豈分橐中之體散置三江中乎人若恨差也仇讐未死子孫遺在可也今吳國已滅夫差無類吳爲會稽立置太守子胥之神復何怨苦爲濤不止欲何求索吳越在時分會稽郡越治山陰吳都今吳餘暨以南屬越錢塘以北屬吳錢塘之江兩國界也山陰上虞在越界中子胥入吳之江爲濤當自吳上界中爲何入越之

地怨恚吳王發怒越江違失道理無神之驗也  
抱朴子子胥始死耳天地開闢已有潮水矣

燕肅海潮論觀古今諸家海潮之說亦多矣或謂天

河激涌

葛洪潮說

亦云地機翕張

見洞真正一經

盧肇以日激

水而潮生封演云月周天而潮應挺空入漢山涌

而濤隨

施師謂僧隱之言

析木大梁月行而水大

見寶叔蒙海濤

志

源殊派異無所適從索隱探微宜伸確論大率

元氣噓翕天隨氣而漲斂溟渤往來潮隨天而進

退者也以日者重陽之母陰生於陽故潮附之於

日也月者太陰之精水乃陰類故潮依之於月也

是故隨日而應月依陰而附陽盈於朔望消於朏  
魄虛於上下弦息於輝朏故潮有大小焉今起月  
朔夜半子時潮平於地之子位四刻一十六分半  
月離於日在地之辰次日移三刻七十二分對月  
到之位以日臨之次潮必應之過月望復東行潮  
附日而又西應之至後朔子時四刻一十六分半  
日月潮水俱復會於子位其小盡則月離於日在  
地之辰次日移三刻七十三分半對月到之位以  
日臨之次潮必應之至後朔子時四刻一十六分

半日月潮水亦俱復會於子位是知潮常附日而  
右旋以月臨子午潮必平矣月在卯酉汐必盡矣  
或遲速消息之小異而進退盈虛終不失其期也  
或曰四海潮平來皆有漸惟浙江潮至則亘如山  
岳奮如雷霆冰岸橫飛雪崖旁射澎騰奔激吁可  
畏也其漲怒之理可得聞乎曰或云夾岸有山南  
曰龕北曰赭二山相對謂之海門岸狹勢逼涌而  
爲濤耳若言狹逼則東溟自定海吞餘姚奉化二  
江侔之浙江尤甚狹逼潮來不聞濤有聲也今觀

浙江之口起自纂風亭北望嘉興大山水濶二百

餘里故海商船舶畏避沙渾不由大江惟泛餘姚

小江易舟而浮運河達於杭越矣蓋以下有沙渾

南北亘連隔礙洪波蹙遏潮勢夫月離震兌他潮

已生惟浙江潮水不同月經乾巽潮來已半濁浪

堆滯後水益來於是溢於沙渾猛怒頓涌聲勢激

射故起而爲濤耳非江山狹逼使之然也

宋中有潮蹟或

問燕龍圖潮論是耶非乎答曰試與子於一溝之內觀之引水滿溝則其水必平進於溝之半累碎

石爲齟齬從上流傾水勢必經齟齬而斗瀉於下水之激涌無怪也燕公所謂渾者水中沙也錢塘



海門之潭亘二百里夫水盈科而後進潮水未及  
潭則錢塘之江尚窄空也及既長而冒之自潭斗  
瀉入江又江沙之漲或東或西無常地潮爲沙岸  
所排助其激涌震天動地峩峩而來水之理也曷  
足怪乎愚所謂齟齬者猶之潭耳故錢塘潮候率  
遲於定海者定海平進而錢塘必俟登潭而後至  
於江其初來也從浙江亭望之僅若一綫非潮小  
也目力遠所見微耳漸近則漸大非潮大也所見  
漸近則漸大固宜及夫潮退則或由潭中低處或  
從潭兩尾滔滔以至於海蓋潭中高而兩頭漸低  
高處適當錢塘之衝其東稍低處乃當錢清曹娥  
二江所入之口錢清江口潭最低潮頭甚小曹娥  
江口潭稍高於錢清故潮頭差大  
是說也習於海道者莫不知之

高麗圖經潮汐往來應期不爽爲天地之至信古人  
嘗論之在風俗記以爲海鱗出入之度浮屠書以

爲神龍之變化竇叔蒙海濤志以爲水隨月之盈虧盧肇海潮賦以爲日出於海衝擊而成王克論衡以爲水者地之血脉隨氣進退率未之盡大抵天包水水承地而一元之氣升降於太空之中地乘水力以自持且與元氣升降互爲抑揚而人不覺亦猶坐於船中而不知船之自運也方其氣升而地沉則海水溢上而爲潮及其氣降而地浮則海水縮下而爲汐計日十二辰由子至巳其氣爲陽而陽之氣又自有升降以運乎晝由午至亥其

氣爲陰而陰之氣又自有升降以運乎夜一晝一夜合陰陽之氣凡再升再降故一日之間潮汐皆再焉然晝夜之攻擊乘日升降如應乎月日臨於子則陽氣始升月臨於午則陰氣始升故也汐潮之期日皆臨子晝潮之期月皆臨午焉又日行遲月行速以速應遲每二十九度過半而月行及之日月之會謂之合朔故月朔之夜潮日亦臨子月朔之晝潮日亦臨午焉且晝即天上而言之天體西轉日月東行自朔而往月速漸東至於漸遲而

潮亦應之以遲於晝故晝潮自朔後迭差而入於  
夜此所以一日午時二日午末三日未時四日未  
末五日申時六日申末七日酉時八日酉末也至  
夜即海下而言之天體東轉日月西行自朔而往  
月速漸西至於漸遲而潮亦應之以遲於夜故夜  
潮自朔後迭復而入於晝此所以一日子時二日  
子末三日丑時四日丑末五日寅時六日寅末七  
日卯時八日卯末也以時有交變氣有盛衰而海  
潮之所至亦因之爲大小當卯酉之月則陰陽之

交也氣以交而盛故潮之大也獨異於餘月當朔望之後則天地之變也氣以變而盛故潮之大也獨異於餘日今海中有魚獸殺取皮而乾之至潮時則毛皆起豈非氣感而類應之自然歟

史伯璿管窺外

編是篇所論既以爲氣有升降又以爲地有沉浮既以爲乘日升降又以爲如應乎月初無的見但務臆度正醫家所譏譬猶獵不知兔而廣絡原野冀一人之獲術之疎也甚矣況皆以升降屬之氣又以升降屬之日所謂升降一與二與且地之與水俱爲有形之物則氣有運動形皆隨之可也今乃氣之一升一降獨地爲之一沉一浮而水則皆與氣不相干惟因地之浮沉而有溢有縮焉豈理也哉况形隨氣動則氣升而地浮氣降而地沉可也今乃氣升而地反沉氣降而地反浮是地與氣

亦不相干矣不但水也凡此又皆病之小者獨地有浮沉之說其病最大浮沉則動上動下無寧靜時矣吾聞天動地靜矣未聞地亦動也意者地本不動特論者無以爲潮汐之說故強之使動耳又何足辨乎唯篇末時有交變氣有盛衰之言似有可取當存之以備一說

朱子語類潮之遲速大小自有常舊見明州人說月

加子午則潮長自有此理沈存中筆談說亦如此

謂月在地子午之方初一卯十五酉性理大全問

子午則潮長未識其說潛室陳氏曰此說不可曉今海居者但云月上潮長月落潮退誠驗其言是乃日加卯酉方位非子午也朔日之潮可驗朔日月與日會日才出卯方即潮長才入酉方即潮又長是月與日相隨出沒

吳子壽答高起巖論潮書坎者月之體月者水之精  
月與水一而已矣在天爲月在地爲水天有陰陽  
太少而月爲太陰地有剛柔太少而水爲太柔式  
人以方諸取水於月其氣類固相感也而况夫子  
午之位乃陰陽之始於其所始而月加焉則陰與  
陽感而陰以升陰與陰遇而陰以盛水陰類也當  
其所加之時涌而逆上從其類也月一晝夜凡一  
加午故潮一日再生月一日退天十三度十九分  
度之七故潮日遲於一日所以初三之潮晝遲而

入十八之夜十八之潮夜遲而入初三之晝也一月之間生明生魄潮亦再盛焉生明之潮則自前月二十六長水謂之起信歷晦朔至月三日謂之大信初四潮勢漸殺謂之落信歷上弦至月十日謂之小信生魄之潮則自十一始長歷望至十八而盛自十九始殺歷下弦二十五而再其起落大小之信亦如之天下之至信者莫如潮也落盛衰各有時刻故潮得以信言也月於一月之間漸遲而縮一日潮於兩信之內漸遲而縮兩潮秋月最



明秋潮最盛亦其理然也又嘗即易考之坎爲月  
魄離爲月魂震生明也兌上弦也乾望卦也巽生  
魄也艮下弦也坤晦卦也生明之盛非無故而盛  
也坤一索而得長男故盛過兌少而往則衰矣生  
魄之盛亦非無故而盛也乾一索而得長女故盛  
過艮少而往則衰矣驗之於月參之於卦潮之理  
其殆庶幾乎或曰誠如是則陽之盛莫如乾陰之  
盛莫如坤潮不於是焉大而顧大於震明巽魄何  
耶曰茲又先天後天之說也不本諸先天無以見

造化之全體不參諸後天無以見造化之妙用先天之卦體也乾坤離坎位於四正震巽艮兌位於四維而月之月天實配之後天之卦用也退乾於西北退坤於西南父母老而不用而長男代父長女代母居東南生長之方天地間萬物萬事成於此乎權輿故其爲氣也莫盛焉而潮之大信實配之月配其體則陽爲明陰爲魄而乾坤當望晦之位乃陰陽之極也潮配其用則長爲盛少爲衰而震巽當大信之候乃陰陽之長也夫如是則其不

乾坤而震巽也有由矣或又曰亦何以知其必取於卦耶曰以納甲家啟之納甲者如生明之月昏出於庚震則納庚生魄之月晨見於辛巽則納辛之類是也陰陽者流用之率驗則月與卦相爲用也審矣潮而有取於月也不亦有取於卦乎哉或又曰月之說然耶則潮之爲候亦宜月半以前由微漸大月半以後由大漸微以象夫三五而盈三五而虧可也今乃與明魄之生兩盛焉何哉曰明魄之盛固已如前所云然月一月一周天而一日

之內則一加子一加午者也潮於月加子午之時  
一日再至故亦於月生明魄之日一月而再盛焉  
月之一潮之再若不相似而實相感召非深於理  
者未易以語此或又曰子所論浙江潮也他江亦  
有潮其遲速不同何歟曰潮之生必生於月出之  
海浙江之去海爲近故其至也如特他江所去有  
遠近故所至有遲速耳或又曰古今言潮者必推  
浙江亦謂銀山雪屋有頭數丈此爲異耳他江之  
潮第如涌水復與此不同何歟曰浙江去潮生處

近掀天沃日之勢方盛而不可遏稽山龕山橫鎖  
江口頓然斂寬就窄其勢必至於衝激奔射也他  
江去潮生處遠遠則必殺故但涌水而已又何疑  
焉

潮隨元氣一晝夜小升降故一日之間潮凡再至一  
月之間大升降故十五日而易一節以律管候氣  
驗之管之長短不同某氣至則某管應元氣升降  
有小有大審矣天地之數奇而不齊者也故月有  
小盡大盡歲有一閏再閏潮之爲大汛也隨大小

盡與閏亦未嘗差焉驗潮之大小莫若錢塘西興也雖以朔望爲大汛之候然晦前二三日望前一二日潮蓋有登閘者或朔日二日三日四日不登閘至五日而始大或十五十六十七十八十九二十不登閘至二十一而始大西興之閘稍低於錢塘或至二十三日潮亦登此無他節氣參差不齊則潮亦爲之進退如前所云或攬前在二十九三十及十四十五或落後在初四初五等凡二十二十一其大概固如是也

就日錄東海漁翁海潮論云地浮於大海隨氣出入  
上下地下則滄海之水入於江謂之潮地上則江  
河之水歸於滄海謂之汐浙江發源最近江水少  
海水多其潮特大潘洞浙江論曰海門有二山曰  
龕曰赭夾岸潮之初來亦慢將近是山岸狹勢逼  
始涌而爲濤

宣昭浙江潮候圖說大江而東凡水之入於海者無  
不通潮而浙江之潮獨爲天下奇觀地勢然也浙  
江之口有兩山焉其南曰龕山其北曰赭山並峙

於江海之會謂之海門下有沙潭跨江西東三百  
餘里若伏檻然潮之入於浙江也發乎浩渺之區  
而頓就斂束逼礙沙潭回薄激射折而趨於兩山  
之間拗怒不洩則奮而上躋如素蜺橫空奔雷殷  
地觀者膽掉涉者心悸故爲東南之至險非他江  
之可同也原其消長之故者曰天河激涌曰地機  
翕張揆其晨夕之候者曰依陰而附陽曰隨日而  
應月地志濤經言殊旨異胡可得而一哉蓋圓則  
之運大氣舉之方儀之靜太水承之氣有升降地



有浮沉而潮汐生焉月有盈虛潮有起伏故盈於朔望虛於兩弦息於朏魄消於朏魄而大小準焉月爲陰精水之所生日爲陽宗水之所從故晝潮之期日常加子夜潮之候月必在午而晷刻定焉卯酉之月陰陽之交故潮大於餘月大梁析木河漢之津也朔望之後天地之變故潮大於餘日寒暑之大建丑未也一晦一明再潮再汐一朔一望再虛再盈天一地二之道也月經於上水緯於下進退消長相爲生成歷數可推毫釐不爽斯天地

之至信幽贊於神明而古今不易者也杭之爲郡  
枕帶江海遠引甌閩近控吳越商賈之所輻輳舟  
航之所駢集則浙江爲要津焉而其行止之淹速  
無不畢聽於潮汐者或違其大小之信爽其緩急  
之宜則必至於傾墊底滯故不可以不之謹也某  
承乏茲郡屬兵革未弭之秋信使之往來師旅之  
進退雖期會紛紜邊陲警急必苦之曰謹候潮汐  
毋躁進以自危然而迹累肩摩晨馳夕驚有不能  
人喻而必說之者考之郡志得四時潮候圖簡明

可信故爲之說而刻石於浙江亭之壁間使凡行  
李之過是者皆得而觀之以毋蹈夫觸險躁進之  
害亦庶乎思患而預防之之意云

春秋同

初一日 十六日 午末 夜子正 大

初二日 十七日 未初 夜子末 大

初三日 十八日 未正 夜丑初 大

初四日 十九日 未末 夜丑末 大

初五日 二十日 申正 夜寅初 下岸

初六日 廿一日 寅末 晚申末 漸小

初七日 廿二日 卯初 晚酉初 漸小

初八日 廿三日 卯末 晚酉正 漸小

初九日 廿四日 辰初 晚酉末 小

初十日 廿五日 辰末 晚戌正 交澤

十一日 廿六日 巳初 夜戌末 起水

十二日 廿七日 巳正 夜亥初 漸大

十三日 廿八日 巳末 夜亥正 漸大

十四日 廿九日 午初 夜亥末 漸大

十五日 三十日 午正 夜子初 極大

夏

初一日 十六日 午末 夜子正 大

初二日 十七日 未初 夜子末 大

初三日 十八日 未正 夜丑初 大

初四日 十九日 未末 夜丑正 大

初五日 二十日 申初 夜丑末 下岸

初六日 廿一日 寅初 晚申正 小

初七日 廿二日 寅末 晚申末 小

初八日 廿三日 卯初 晚酉初 小

初九日 廿四日 卯末 晚酉正 小

初十日 廿五日 辰初 晚酉末 交澤

十一日 廿六日 辰末 夜戌初 起水

十二日 廿七日 巳初 夜戌末 漸大

十三日 廿八日 巳末 夜亥初 漸大

十四日 廿九日 午初 夜亥末 漸大

十五日 三十日 午末 夜子初 大

冬

初一日 十六日 午末 夜子初 大

初二日 十七日 未正 夜子末 大

初三日 十八日 未末 夜丑初 大

初四日 十九日 申初 夜丑末 大

初五日 二十日 申正 夜寅初 下岸

初六日 廿一日 寅末 晚申末 漸小

初七日 廿二日 卯初 晚酉初 小

初八日 廿三日 卯末 晚酉正 小

初九日 廿四日 辰初 晚酉末 小

初十日 廿五日 辰末 夜戌初 交澤

十一日 廿六日 巳初 夜戌正 起水

十二日 廿七日 巳正 夜戌末 漸大

十三日 廿八日 巳末 夜亥初 漸大

十四日 廿九日 午初 夜亥正 漸大

十五日 三十日 午正 夜亥末 漸大

毛先舒答潮問問浙江何以有潮也答曰地勢爲之

也天下之水皆有潮然多暗長水或涌水而已惟

錢塘之潮澎湃奔騰如爐鼓釜沸以自海入江與



他水絕殊蓋地勢使然也何以晝夜再至且以漸遲也曰應月候也月行較日以漸遲一日常不及

日十二度故潮至亦以漸遲也其晝夜再至則應月之中也月一晝夜則再中或中於天或中於地之下月中則潮至月以朔之午正刻中於天以子末刻中於地初二日則以午末刻中於天以丑初刻中於地其後中期以次漸遲至望則以子正刻中於天午初刻中於地十六日則復如朔朔日潮至以午正子末初二日潮至以午末丑初望日潮

至以子正午初十六日則復如朔其漸遲之期無  
不如月之中天中也秋則壯何也亦應月也月  
華至秋則益壯所謂地勢者可詳歟曰其勢有三  
錢塘之江將入海處有龔赭二山焉屹相峙如門  
下有沙檻江流至此則一束故海潮至此亦一束  
海水長欲入江束於山不得駛則怒譬人之欲入  
門也人多門狹則喧動抨擊以爭門唯水亦然此  
山勢也北水悍南水緩而錢塘之水發丹陽經睦  
杭紹興諸州逶迤曲折以入於海故曰浙江浙者

折也則水尤緩他江悍到口與海力敵敵則潮至不敢逞爲暗潮浙江緩到口不能與海力敵是則海壓江而陵出其上潮至敢逞則爲怒潮此水勢也浙之方爲巽象曰剛巽乎中正而志行柔皆順乎剛江柔巽海讓潮逞怒此方勢也此三者浙江之所以有潮與他水殊不足怪也紛說無當徒益滋惑客曰潮何以名爲潮也曰潮者朝也朝月也曰海百谷王矣而何以朝爲曰月者萬水之天子也故海臣水而君月月中於天中於地猶天子之

涖於明堂也故海朝之或曰朝江也書云江漢朝  
宗於海江朝海也潮者海朝江也故窮歸宿則海  
大江小潮源本則江高海卑可以互爲尊則亦可  
以互爲朝也然則名潮復名汐者何故得毋潮取  
其朝至而汐取其夕至耶曰配以汐名或生此然  
潮之義不繫焉審以其朝至而名潮也則十二時  
皆有潮奚止朝夕且夕至者亦未嘗不名潮故曰  
晚潮曰暮潮曰夜潮故潮者統辭也汐加之辭也  
而實非可以配潮故統潮與汐皆名潮是朝會之

義非朝晨之義也此其所以名潮者也

楊魁見潮論余嘗登海寧城樓見海潮薄岸怒濤數十丈若雪山駕鼇雷奔電激昔人謂龕赭二山峙爲海門故激而爲濤今觀洶溢之勢却在海門之外非龕赭二山所爲明矣抱朴子曰取物多者其力盛來遠者其勢大潮水從東來地廣道遠乍入狹處陵山觸岸從直赴曲其勢不泄故隆崇涌起而爲濤理或如此未登海上不知果爾否也旣數日登虞山險山巔眺望則見海在浙東西者兩岸

有際水勢洄曲旁多山峙海中亦崒峩星列彼自  
浩渺之區入於阻隘安得不衝擊而爲濤乎即此  
推之定海松江之裏逶迤曲折兩岸有際元非溟  
渤望洋無際者實大海之汊入於浙中者爾故觸  
山薄岸震撼擊撞勢從內溢而無外泄所以來遠  
勢大愈進愈激未抵海門洶濤已甚矣此理之常  
無足恠者或曰潮盛於八月十八日者又何也余  
曰此邵子從月之論可信也日激水而潮生月離  
水而潮大是也或又曰地浮於水天在水外日入

則晚潮激於左日出則早潮激於右日隨天旋水  
因灼激於月何與也余曰月者水之精也八月金  
盛於酉水之沐浴也於此而水月從陰其勢盛矣  
月離水而潮大亦氣使然也或者曰強弩射潮水  
不近城則又何也余曰此非其精誠之感果能與  
神抗也余嘗於捕魚者詢之夫水激而上水族從  
之上者其勢然也捕魚者於潮頭初過不敢投網  
待大魚三過之後乃網其細者又時至於割網放  
其不能舉者水族乘潮而上者衆矣水族在海中

者多歷年所強食弱肉受精不少則精靈有知逢射知避者物性之靈則然也或又曰宋之末年潮多不振近日浙江亦鮮怒濤則又何也余曰氣有盈怯息於彼則消於此古來由然所以有自南而北自北而南之說杜鵑之鳴洛陽邵子言之矣嗟乎吾浙中文勝而鮮實人繁而物索奸宄盛而正氣消此潮勢之所以不振也操造物之責臨蒞斯土者盍反其本以固元氣庶幾其可救乎

郭濬寧邑海潮論寧邑海潮必自東起先阨於近洋



八山之內勢已洶涌錢塘江濤必自西來阨於龕  
赭海門而出相值在寧邑之南百餘里之內勢益  
湍怒安得無溟騰潰溢之患幸江濤輕淡而剽疾  
海潮鹹重而沉悍江水朝宗之性終不勝大海怒  
張之氣由是海潮仍挾江濤過海門更西抵嚴灘  
而後退故潮汐之大小有常期寧潮自東而西有  
常道至於江濤之緩急鹹淡水之相值無常期  
亦無常處若更換以颶風之怒號上流之添漲不  
免駭浪橫飛怒濤旁射吾寧實逼處此不可謂橫

過之潮可長恃以無恐也

**海鹽縣圖經**此縣潮頭奇猛絕異他處候迺稍不殊  
爾日朔望子午再至餘日遞退半月復月三日十  
八日至再王餘日遞退亦半月復

**平湖縣志**海潮東北自金山來西北至浙江為土潭  
自浙江回歷海寧黃灣至澉浦海鹽為下潭皆可  
泊舟

**紹興府志**蕭山潮候率遲於餘姚昔人謂餘姚平來  
蕭山者必登渾而後至非也地勢高下然耳

萬歷寧波府志 海潮自定海入鄞江六十里至府治

東北分爲二江西北通慈谿東南通奉化潮汐往來各有候其在鄞初一十六日子末午末平初二十七日丑初未初平初三十八日丑正未正平初四十九日丑末未末平初五二十日寅初申初平初六二十一日寅正申正平初七二十二日卯初酉初平初八二十三日卯正酉正平初九二十四日卯末酉末平初二十五日辰初戌初平二十六日辰正戌正平二十七辰末戌末

平十三二十八日巳初亥初平十四二十九日巳

正亥正平十五三十日巳末亥末平定海以次而

早慈奉以次而遲

慈谿縣志潮候每月逐日晝夜相對初一十六日子午初潮漲

寅申初潮平辰戌初潮涸初二十七日子午中潮

張寅申中潮平辰戌中潮涸初三十八日子午末

潮張寅申末潮平辰戌末潮涸初四十九日丑未

中潮張卯酉中潮平巳亥中潮涸初五二十日丑

未末潮張卯酉末潮平巳亥末潮涸初六廿一日

寅申初潮張辰戌初潮平子午初潮涸初七廿二

日寅申中潮張辰戌中潮平子午中潮涸初八廿

三日寅申末潮張辰戌末潮平子午末潮涸初九

廿四日卯酉中潮張巳亥中潮平丑未中潮涸初

十廿五日卯酉末潮張巳亥末潮平丑未末潮涸

十一廿六日辰戌初潮張子午初潮平寅申初潮

涸十二廿七日辰戌中潮張子午中潮平寅申中

朝夕

十四	十二	廿四	寅申	平初	一十六	二十	十六	十四	十一	初九	酉中	未潮	潮涸
廿九	廿七	卯酉	平初	子午	子午	子午	子午	子午	子午	子午	潮涸	潮涸	十三
平	巳	平	初七	平	平	平	平	平	平	平	十五	十四	廿八
平	平	初	廿二	初	初	初	初	初	初	初	三十	廿九	日
十五	十三	廿五	酉平	初五	子午	子午	子午	子午	子午	子午	日	日	辰
三十	廿八	辰	平初	二十	寅申	寅申	寅申	寅申	寅申	寅申	辰	辰	戌
子	巳	平	八	寅	巳	巳	巳	巳	巳	巳	戌	戌	未
午	亥	十一	廿三	申	亥	亥	亥	亥	亥	亥	未	未	潮
平	平	廿六	卯酉	平初	初三	初三	初三	初三	初三	初三	未	未	漲
		辰	平初	初六	初八	初八	初八	初八	初八	初八	初	初	子
		戌	初九	廿一	初八	初八	初八	初八	初八	初八	初	初	午
		平		一	初八	初八	初八	初八	初八	初八	初	初	未
					初八	初八	初八	初八	初八	初八	初	初	潮
					初八	初八	初八	初八	初八	初八	初	初	平
					初八	初八	初八	初八	初八	初八	初	初	寅
					初八	初八	初八	初八	初八	初八	初	初	申

勅修兩浙海塘通志卷十五

祠廟上

捍災禦患凡有功德於民者列之祀典海塘之築  
障衛民生城郭田廬利賴非細如海神潮神龍王  
各廟胥蠶千秋宜矣至一州一邑之間或修築有  
功載在志乘或聲靈赫濯上俗尊崇所在祠廟亦  
宜一律編纂以昭崇報之義其廟貌雖去塘近而  
無與海塘事者概不列入志祠廟

杭州府

錢塘縣

英衛公廟

咸淳臨安志忠清廟在吳山神伍氏名

員字子胥吳王夫差入越勾踐使大夫種行成於  
吳王許之子胥諫不聽賜之屬鏹以死吳人憐之

爲立祠江上名曰胥山唐元和十年刺史盧元輔

修

盧元輔胥山祠銘元和十年冬十月朝散大夫  
使持節杭州諸軍事杭州刺史上柱國盧元輔

視事三歲塵天子書上畏羣靈下慚蒸人乃啓忠  
祠銘而敘曰維唐數祀興於天下廢淫置明資父  
事君罔有不舉寢廟旣設我命厥新有周行人伍  
公字子胥陪吳之職得死直言國人求忠者之屍  
禱水星之舍將報鵠革遂臨浙江千五百年廟貌  
不改漢史遷曰胥山今曰青山者謬也吁善父爲

孝記曰父仇不與共戴天諫君爲忠經曰諸侯有  
諍臣不失國當阨於宋鄭絕楚出疆在乎爲末官  
臣在奢爲旣壯子坎壞仗節乞師於吳軍鼓丁寧  
五戰至郢鞭墓走昭非逆施也夫差旣王宰嚭受  
賂二十年内越祀又顓泰伯廟血將乾閭閻劍光  
先失公入則諫焉雖言屢出口而車甲已困於齊  
矣蟹稻已奪於歲矣屬鏤之賜竟及其身鴟夷盛  
屍投於水濱憤排鼓怒配濤作神迄今一日再至  
來也海鷗飛陽侯夾從聲遠而近聲近而遠奮  
於吳拂於越汐於楚乃退於是仲秋闕望杭人以  
旗鼓逐之茄蕭和之百城聚觀大耀威靈捲沙墨  
裂地灰截若岸圻城坑迎潮氏格之如呂梁丈人  
爲靈戈威不激浪百里渚塞不先跳擣揭肱再飯  
之間絕其音聲蕩潏千里洪波砥平有滑有脂有  
鹽有腥遙實乎下庭山海梯航雞林扶桑交臂於  
節階金秋在戶雷鼓在堂魏樽漢豆六代笙簧可  
謂奉天爵之馨香獲神人之盛禮佐皇震怒驅叱  
大邪萬里永清人觀斗氣銘曰武王錢紂子胥鞭



平爲人爲父十死一生矯矯伍員執弓挾矢仗其  
寶劍以謁吳子稽首楚罪皆中紂理蒸報子妻殲  
鉏直士赫赫王閭實聽奇謨錫之金鼓以號以誅  
黃旗大舉右廣皆朱戮墓非赭瞻昭乃烏後王嗣  
立執書不泣顛越言潤宰嚭讒輯步光欲飛姑蘇  
待執吾則切諫抉眼不入投於河上自統波濤晝  
夜兩至懷沙類騷洗滌南北簸蕩東西蠻夷卉服  
罔敢不來雖非命祀不讓瀆濟帝帝王王代代明  
明表我忠誠

景福二年封廣惠侯宋大中祥符五年海

潮大溢衝激州城詔本州每歲春秋醮祭賜忠清

廟額封英烈王九年馬亮知杭州禱祠下明日潮

殺又出橫沙數里隄岸乃成康定九年守蔣堂重

建

王安石伍子胥廟銘予觀子胥出死亡逋竄之  
中以客寄之身卒以說吳折不測之楚仇報恥

雪名震天下豈不壯哉及其危疑之際能自慷慨  
不顧萬死畢諫於所事此其事與夫自恕以偷一  
時之利者異也孔子論古之士大夫若管夷吾臧  
武仲之屬苟志於善而有補於當世者咸不廢也  
然則子胥之義又曷可少耶康定二年余過所謂  
胥山者周行廟庭歎吳亡千有餘年事之興壞廢  
革者不可勝數獨子胥之祠不徙不絕何其盛也  
蓋亦子胥之節有以動後世而遺愛尤在吳也後  
九年樂安縣公為杭使其州人力而新之臨川主  
安石與之銘曰烈烈子胥發節窮逋遂為冊臣奮  
不圖軀諫合謀行隆隆之吳厥發不遂邑都俄墟  
以智死昏忠則有餘胥山之巔殿屋渠渠千載之  
祠如祠之初孰作新之民歡而超維忠  
肆懷維孝肆孚我銘祠庭示後不誣  
嘉祐七年  
太守沈邁修  
王安國忠清廟記  
胥山廟者吳人奉  
使之歲時祈祝未嘗懈也嘉祐七年長興沈公作  
藩於杭政以大成下畏以愛既而雨暘或愆躬禱

於廟歲仍大熟於是邦人皆以爲神之賜也乃相  
與告於公曰願治廟堂以安神靈公旣樂詔教之  
施能媚于民而又嘉民之不忘神惠而思爲報也  
故聽之八年六月廟成公遂祭享耆稚嗟歎咸願  
刻石以詩題之而使人來請詞於臨川王安國乃  
作詞曰維此勾吳大伯肇居其後綿綿享有邑都  
閭閻夫差力欲圖霸有臣子胥才實剛者報楚入  
郢遂棲越君使國爲雄我志獲伸彼何辜詔冒貨  
奸宄我憤于忠國亦旋毀武林之墟胥山之崗立  
廟以祀民思不忘旣歷年久報祀不解以迄於今  
常遣祈拜公作邦伯實治廟民每祝必誠獲應於  
神卒是逾歲風雨順節謂非神休有或菑孽人乃  
告公廟堂將傾願易而新不成遽成嚴嚴之堂有  
翼其廡憑依之威觀者俯僂衆曰迄事公即大祭  
賓贊肅虔簫鼓喧沸豕羊具肥桂酒香醇神顧享  
之醉飽欣欣衆願具石刻載厥美繫之銘詩庸告  
無政和六年加封威顯廟燬於建炎兵火興於紹

興二十二年至三十年加封忠壯乾道五年周安撫  
淳重修嘉定十七年累封爲忠武英烈威德顯  
聖王紹定四年再燬賜緡錢重建嘉熙三年趙安撫  
與權又易而新之杭州府志俗名伍公廟元改  
封順祐忠孝威德顯聖王明正統十四年重修萬  
歷八年重建浙江通志

國朝雍正三年

勅封英衛公其廟宇修葺動正項帑金每歲春秋致祭

昭貺廟

咸淳臨安志

在候潮門內渾水閘東故司

協順廟

西湖遊覽志在石塚其神陸圭昭慶軍人

宋宣和中引兵攻方臘敗之歿而爲神紹興間海塘衝激江岸神檄陰兵却潮潮勢遂平淳祐間江潮衝激尤甚隨築隨圯神與三女揚旗空中浮石江面以顯其靈岸賴以成浙西帥臣徐粟以聞於朝賜廟額曰協順封神爲廣陵侯三女爲顯濟通濟永濟夫人旁有小廟祀十二潮神各主一時仁和縣

順濟聖妃廟

成化杭州府志在艮山門外艮山有

祠自商份感夢始開禧寶慶一再創建又有別祠

在候潮門外蕭公橋

丁伯桂艮山順濟聖妃廟記

人禍福歿廟祠之號通賢神女或曰龍女也蕭臨

海有堆元祐丙寅夜現光氣環堆之人一夕同夢

曰我湄州神女也宜館我於是有祠曰聖堆宣和

壬寅給事路公允迪載書使高麗中流震風入舟

沉溺獨公所乘神降於檣遂獲安濟明年奏於朝

賜廟額曰順濟紹興丙子以郊典封靈惠夫人逾

年江口又有祠祠立二年海寇憑陵效靈空中風

拏而去州上其事加封昭應其年白湖童郤一夕

夢神指爲祠處丞相陳公俊卿乃以地券奉神立

祠於是白湖又有祠時疫神降曰去湖丈許脉有

甘泉我爲郡民續命於天飲斯泉者立痊掘泥坎

甘泉涌出請者絡繹朝飲夕愈甃爲井號聖泉郡

以聞加封崇福越十有九載福興都巡檢使姜特

立捕寇遙禱響應上其事加封善利淳熙甲辰民

封郎官張夏祠四朝聞見錄杭州江岸率多薪土  
潮水衝激不過三歲輒壞夏令作石堤一十二里  
以防江潮旣成杭人德之慶歷中立廟於堤上嘉  
祐十年又因功贈太常少卿政和二年八月封寧  
江侯改封安濟公併賜額曰昭貺浙江通志

國朝雍正三年

勅封靜安公春秋致祭

東安濟廟

萬歷錢塘縣志在馬坡街祀宋司封郎  
中張夏俗名祖廟又名太平院錢塘縣志初夏治

潮患築石塘自六和塔至東清門今名太平門與清泰門相距里許今馬坡街在清泰門旁是廟或即舊時堤上所立後入城奉爲土穀者也

潮神廟

江塘志略

國朝康熙四十三年江塘工成督修同知甘國奎建潮神廟於江干之善利院設主祀諸有功於江塘者又建觀潮樓於其旁四十四年

聖祖仁皇帝

賜御書恬波利濟之額國奎敬摹製匾恭懸樓上



苗葛侯郭禱之丁未旱朱侯端學禱之庚戌夏旱  
趙侯彥勵禱之隨禱隨答具狀聞於兩朝易爵以  
妃號惠靈慶元四年加助順之號嘉定元年加顯  
衛十年加英烈神之祠不獨盛於莆閩廣江浙淮  
甸皆祠也艮山之祠舊傳監丞  
商公份尉崇德日感夢而建杭州府志天妃林

氏世居莆之湄洲嶼五代閩王時都巡檢林愿之  
第六女也宋太平興國四年三月二十三日妃始  
生有異徵幼悟玄理既長能乘席渡海乘雲島嶼  
間人呼爲神女居室三十年默與神契雍熙四年  
卒里人祠之雨暘有禱輒應屢著靈異於江湖間  
宣和中賜廟號曰順濟元海運時加封天妃明洪

武間改封聖妃永樂七年復改今額加封洪仁普

濟護國庇民明著天妃賜寶旛諭祭浙江通志

國朝康熙十九年封天妃爲護國庇民妙靈昭應宏仁

普濟天妃遣禮部司官致祭

天后宮

浙江通志在武林門內城東北隅亦祀順

濟聖妃

國朝雍正九年總督李衛毀西洋天主堂改建

顯忠廟

仁和縣志在長生橋西宋紹興初建祀漢

博陸侯霍光初廟在秀州宣和間賜額紹興時妙

建於杭禱祠應若影響嘉泰紹定間有反風滅火  
之異元元統初火延清湖岸焦土者萬有餘區死  
者無算神復顯靈如初於是士民葺廟以答明貺  
潛說友舊碑無存惟浙江鄉進士葉森所撰碑記

在橋

葉森顯忠廟記傳曰聖王之制祭祀也樂大

患捍大災則祀之有功於民則祀之其所以  
祀之之意答明貺也若山川社稷之炳靈故在在  
尸祝之皆有功於民能禦患捍災者也是以書名  
太常勒功丹史而天下羣祀焉杭之清湖開元宮  
西有廟曰顯忠土人稱霍使君祠漢大將軍博陸  
候也按舊志云吳孫皓時神降於庭自言漢霍光  
求立祠千金山之鹽場以捍水患宋紹興初建行  
廟於錢塘左三廂之長生橋仍加封忠烈順濟昭  
應正質諸宋會要秀州華亭縣小金山漢霍光祠

宣和間賜額曰顯應忠烈順濟公廟紹興之封異  
其名號耳初廟基屬民家乃鳩錢券其地定爲神  
居棟宇旣完禱祠日盈事無巨細咸請於神應若  
影響至嘉泰紹定間兩有反風滅火之異紀事傳  
信廟碑具存國朝元統初夏六月甲申火自朝至  
於日中爰始市西坊至清湖岸而止焦土者萬有  
餘區死如焚如棄如者不可以數計民窘急駭懾  
震怛望廟以呼如嘉泰紹定之時神赫赫厥靈騷  
風遽轉隻瓦不毀廟貌如故暨左右民克保厥居  
錢塘縣學去廟爲最近時有司新刊會要於學予  
忝校讐將完約費五萬餘緡亦賴以存神之功能  
如是者不一推而廣之則禦大患捍大災不難矣  
詎止有功於民而已耶於是抗之士民聚金葺廟  
以答明貺猶以未盡其誠將謀刻祠以紀靈異宏  
文輔道粹德真人眉叟王公捐粟爲助承務郎遂  
昌縣達魯花赤阿剌帖太公施金若干采飾神像  
奉議大夫會昌州知州管公彥清爲之勒石請文  
於予辭不獲故得紀其實爲他時守土之臣能以

神功申請奉常載在祀典與百神受職則國家愛民禮神者至矣神之福斯民者宜何如也哉

### 周宣靈王廟

仁和縣志

在褚家堂廣豐倉側神姓

周名雄字仲偉杭之新城淶渚人宋嘉定四年爲母疾走婺源祈佑於五顯廟回至衢而卒附童言曰五顯靈威需我輔翼生不封侯死當廟食郡人

於是立廟有所祈禱輒應屢顯靈進封王爵

錢養廉周

宣靈王像贊并序王生於宋季銳志恢復抑鬱以歿其忠誠激烈固宜與日月爭光矣碑載幻蛙事尤奇每歲三月四日傳王降生之辰蛙於時倏來倏去光彩特異豈望帝之魂千載未泯耶至捍災禦患數著靈應里人香火甚虔與褚僕射岳武穆相鼎峙余感其事并係以贊辭如戟今目如炬矯

矯如龍兮桓桓如虎大業未酬兮壯心獨苦寧死  
爲厲鬼兮毋生而爲鼠英風漠漠兮香雲楚楚享  
郊豆于千秋兮永爲浙江通志周宣靈王杭之新  
我生靈恤災而禦侮城縣太平鄉淥渚人浙省是處立廟其在杭城者  
錢養廉序稱生於宋季銳志恢復抑鬱以歿其在  
新城者方回廟記止載歿後靈爽不言神主前事  
徐士晉碑記稱神賈於衢聞母病破浪而行爲水  
所沒顯神於衢勅爲江神其在衢州者志在肉身  
斂布加漆現今植立廟中餘與徐記同至錢廣居  
建德縣神廟記則云初名雄後改名繆宣少授仙

指失足墮水溯波而上香聞數十里因而建廟塑像於衢城之西詳觀諸記或稱孝或稱忠或稱仙顯不相侔又方回記錢廣居記封爵年代亦各不符然現祀爲江神其肉身現在衢府廟中則爲孝子無疑應以徐記及衢志爲正

晏公廟

萬歷杭州府志在武林門北夾城巷內祀元晏戍仔戍仔江西清江鎮人元初輸文錦於上都因而尸解人以爲神立祠祀之後顯靈江湖間洪武初封平浪侯二十三年浙江都指揮儲傑以

督漕獲庇捐建今祠

茶槽廟

仁和縣志在會城東當錢塘盡界沿江七

十里北至臯亭山屢受潮患永樂間新城茶商陳  
旭出橐中金築新塘後乙未臯亭山洪水與江潮  
相接沿江俱沒塘壞旭思資蓄已盡功不成遂躍  
身入潮屍隨潮浮至臯亭山沙隨屍而漲塘乃成  
屍隨葬焉巡撫入告勅封茶槽土地興福明王迄  
今二百餘年無潮患士民戴德奉其神各方建祀  
有上新中新下新等祠



潮王廟

仁和縣志在芳林鄉又名石姥祠其神爲

唐石瑰後爲釋氏所有建昭化寺而廟附焉

僧本誠潮

王廟記按晏殊輿地志古有石姥祠舊碣載石姓瑰名生於唐長慶三年錢塘古稱壽江民苦潮害王奮力築堤以捍水勢祁寒劇暑不輟功未就竟死於潮後爲神咸通中官爲立廟封潮王宋宣和間睦寇犯順時朝廷以韓世忠禦敵陰雲四合聞空中叱咤聲仰見旗幟書石姥潮王之號軍士奮勇大破寇兵嘉熙間潮水復作潰堤衝岸漂蕩民居人力不能禦京尹趙公與篋躬禱祠下潮復故道有司上其事加封忠惠顯德王皇慶二年主僧宗禮率其徒即寺剏毘盧閣

廣靈廟

成化杭州府志在石塘壩宋景定四年九

月潮壞江塘里人耆老因立東嶽溫太尉廟請於

朝賜廣靈爲額咸淳五年封正佑侯餘自李將軍  
以下九神皆錫侯爵李孚佑錢靈佑劉顯佑楊順  
佑康安佑張廣佑岳協佑孟昭佑韋威佑

潮神廟 在沈家埠迤西祀

勅封靜安公張夏寧江王宋恭護國隨糧王運德海潮神  
金文秀平浪侯捲簾使大將軍曹春廟初自明季  
順治中僉事楊樹聲修築石筓塘屢築屢圯禱於  
神始得告成遂重新廟貌雍正十年總督程元章  
委州同李宗典督修益拓而大之乾隆三年大學

士嵇曾筠委通判楊盛芳重修

順濟龍王廟

仁和縣志在湯村鎮政和五年郡守

李偃以湯村巖門白石等處江湖侵囓奏請同兩浙運使劉旣濟措置用石版砌岸因建廟累封靈應昭應嘉應三王廟後陷於海遂廢

惠順侯廟

仁和縣志在江塘宋嘉定五年二月江

潮衝囓石塘帥漕建廟以禱咸淳二年賜忠順額四年七月壽和聖福皇太后布金重建廟址陷於海遂廢

海寧縣

勅建潮神廟 在小尖山之麓

國朝康熙五十九年浙江巡撫朱軾題請於海寧縣小  
尖山建立潮神廟六十一年

勅封運德海潮之神春秋祭祀

欽頒協順靈川

御匾恭懸廟中其旁爲舊時石墩司基地今歸潮神廟管  
業歲收息爲守僧薪水

勅建海神廟 在春熙門內

國朝雍正七年九月奉

上諭

恭紀  
首卷

勅建浙江總督李衛奏請委原任布政使張迺  
原任知府蔣杲王坦監修擇海寧縣治之東購買  
民地四十畝啟建正殿五楹崇奉

勅封寧民顯佑浙海之神以唐誠應武肅王錢鏐吳英衛  
公伍員配享左右配殿各三楹以越上大夫文種  
漢忠烈公霍光晉橫山公周凱唐潮王石瑰昇平  
將軍胡暹宋宣靈王周雄平浪侯捲簾使大將軍  
曹春護國宏佑公朱彝廣陵侯陸圭靜安公張夏

轉運使判官黃恕元平浪侯晏戍仔護國佑民永  
固土地彭文驥烏守忠明寧江伯湯紹恩茶槽土  
地陳旭從祀周迴夾以修廊中爲甬道前爲儀門  
三楹大門三楹左鐘樓右鼓樓門臨河承以石梁  
曰慶成橋橋南歌舞樓三楹繚以粉垣闢左右爲  
廣衢表以二石坊殿後爲重門進內正中恭建

御碑亭敬勒

聖製海神廟碑文後爲寢殿上構岑樓東西配殿由正殿  
之東啟門而入爲天后宮前爲齋宿廳後爲道院

正殿之西爲風神殿後有池有亭池上爲平橋三折而度內爲高軒爲重門後爲水仙閣規制崇闕氣象軒翥經始於雍正八年三月明年十有一月訖工十一年正月

欽頒

御書福寧昭泰四字一幅製額恭懸正殿二月

遣內大臣海望直隸總督李衛告祭乾隆四年六月

欽頒

御書清晏昭靈四字匾額恭懸正殿

恭紀

世宗憲皇帝御製碑文

國家虔修祀典以承上下神祇嶽瀆海鎮之神秩祀惟謹視前代爲加隆朕臨御以來夙夜以敬

天勤民爲念明神之受職於

天而功德被於生民者昭格薦歆敬禮尤至其爲民禦大災捍大患合於祭法所載則尊崇廟貌以昭德報功蓋所以遂斯民瞻仰之願而動其敬畏禘禩之心使無敢慢易爲非以得永荷



明神之嘉貺意至遠也皇輿東南際大海而浙江海寧  
居瀕海之衝龕山藉山刻峙其南颶風怒濤潮汐震蕩  
縣治去海不數百步資石塘以爲捍蔽雍正二年潮涌  
隄潰有司以聞朕立遣大臣察視修築且念小民居恒  
罔知敬畏慢神褻天召災有自爰切諭以修省感應之  
道命所司家喻戶曉警覺衆庶比年以來徼

明神庥佑塘工完固長濶不驚民樂其生間并蕃息越  
七年秋汛盛長幾至泛溢吏民震恐已而風息波恬隄  
防無恙遠近歡呼相慶謂惟

大海之神昭靈默佑惠我烝黎以克濟此朕惟滄海合  
納百川際天無極功用盛大

神實司之海寧爲海壩劇邑障衛吳越諸大郡海潮內  
溢則昏墊斥鹵咸有可虞

神之禦患捍災莫此爲大特發內帑金十萬兩勅督臣  
李衛度地鳩工建立

海神之廟以崇報享經始於雍正八年春三月泊雍正  
九年冬十有一月告成門廡整秩殿宇深嚴丹雘輝煌  
宏壯鉅麗時展明禋典禮斯稱爰允督臣之請勒文穹

碑垂示久遠俾斯民忻悚瞻誦共喻朕欽崇

天道祇迓

神庥懷保兆民之至意相與嚮道遷善服教畏神則

神明之日監在茲顧荅歆饗其炳靈協順保護羣生奠  
安疆宇與造物相爲終始有永弗替朕實嘉賴焉雍正  
十年六月初一日

恭紀

世宗憲皇帝御祭文

維雍正十一年歲次癸丑二月朔越 日

皇帝遣內大臣海望直隸總督李衛等致祭於

寧民顯佑浙海之神曰

明神受職於

天恩覃澤國禦災捍患利賴宏深凡茲東南黎庶所得保  
室家而安耕鑿者

神之賜也朕躬膺

天命撫馭寰區夙夜敬共以承上下神祇之祀所期海宇  
蒼生永蒙庇祐惟茲浙西郡邑實爲瀕海要衝比年以  
來仰荷

神靈嘉貺頻昭安瀾共慶迺者風潮鼓蕩衝潰隄防近  
逼民居吏人震恐朕痾瘵在念軫惻惟殷專遣重臣周  
行相度涓日鳩工爲海疆圖久遠奠安之計用是潔誠  
致禱虔命在工大臣敬展祀事昭告惻忱惟

明神俯念海壖億萬生靈城郭田廬於茲托命隄工木  
石皆出脂膏力役所需民衆勞苦伏冀

宏昭福佑默相大工綏靜百靈風恬波息俾工作得施  
長隄孔固克底厥績護衛烝民保聚生全安享樂利則  
東南列郡溥被庥祥朕實拜

明神之功德於無疆矣謹告

天妃廟

杭州府志舊在縣東二里今移置縣治西

三十步元泰定四年海患庸田副使張子仁立海寧縣志海寧天妃十廟分建千百戶所營內明初所官以分汛海道故各建廟祀天妃萬歷間五廟併慶善寺順治間秦令嘉系毀八廟今改為駐防公署止存八天妃廟云

朝宗王廟

海寧縣志廟在縣西七十里

宋高宗祝文諸侯之

朝王孰敢不欽子孫之宗祖罔有不尊江漢之朝宗於海無以異此廟號以是神之德大矣乃緣初

郊舉此祀典尊酒  
俎肉以祈來格

鎮海廟

海寧縣志

距南城百步負郭面塘內祀捍

海諸神明崇禎戊辰海決潮水高丈餘廟內獨不  
入人咸異之

伍公廟

海寧縣志

祀吳大夫伍員背南城在捍海

塘之陽

胡令公廟

杭州府志

在長安鎮祀唐胡邏

元杭州路鹽官

州儒學教授徐圓胡令公廟碑令公姓胡名邏字  
進思婺州東陽義烏人唐憲宗朝佐中丞裴度平  
淮西以功陞武任將軍宣宗時奉命至海昌召禪  
門齊安國師演法謝恩就坐而化將軍回至長

河過海神祠亦立化於庭有司申聞宣宗遣桑稱  
二御帶追封齊安爲悟空禪師進思爲昇平將軍  
與海神共祀至宋康王南渡乘駿過長河無船可  
渡入廟叩之出門忽有大舟迎王王問其名居曰  
桑稱二姓本里胡進思家人也建炎元年王遣官  
召胡進思併桑稱二人里中並無因廟中有胡將  
軍碑載將軍往海昌召齊安國師事蹟州官申復  
降詔勅封令公海神與桑稱皆進王號並祀土穀  
廟號威烈赫靈之殿泰定間復有方太守入廟禱  
祀蝗不入境之異其父方虛谷任婺州路侯備知  
令公事蹟婺州見有永康縣胡公  
祖廟太守命里人重立碑石云

**海寧縣志**至正

二十年被毀明嘉靖十四年重立宋圖經云令公  
未詳其始臨安志智果院彌勒閣註云晉天福四  
年錢王遣令公胡進思往婺州五代史胡進思以



舊將廢吳越王儼而立俶攷郡志總圖赭山北有  
令公塘豈吳越王時令公曾築運塘故有祠廟歟  
英濟侯廟 海寧縣志俗稱捍沙王廟在縣東三十  
里相傳蕭山布衣張某溺海爲神或曰宋張夏築  
堤捍江人賴以安爲之立祠

朱將軍廟

成化杭州府志在縣東三十六里黃岡

海寧縣志按朱彝力能拔牛尾倒行宋治平初溺  
海爲神著靈應寶祐三年十月勅封佑靈將軍元  
大德二年以捍海立廟黃岡西進封護國宏佑公

天仙府

周宣靈王廟

海寧縣志在硤石鎮審山

嘉靖間邑人沈友儒

碑記侯生淳熙三月四日嘉定辛未為母疾走葵源祈佑五顯回至三衢而卒附童言曰五顯靈威需我輔翼生不封侯死當廟食衢於是立廟新城繼之旱潦禱之輒應疾疫祈之遂痊初稱四七大尉端平二年德興祁門陰捍常山土寇饒州表請封翼應將軍嘉熙元年神威揚邊強敵遠遁兩淮表請加封威助忠翌大將軍淳佑四年改封翊應侯寶祐五年加封助順咸淳七年加封正烈十年加封廣靈舊制神祠封錫自二字至八字止侯兼之蓋渥恩也侯今廟食於硤遠近嚴祀之殆與三衢新城並故撫記侯之生平俾刻於石焉

曹將軍行祠

海寧縣志

祀宋封潮神邑人曹春在

縣西南四十五里巖門山元潘萬選撰記明初顯

聖於五都二圖羽流募建崇禎間沈如初重修

昭烈王祠

海寧縣志神以捍海封宋慶元三年主

簿趙希樞建附葆真菴後在縣東二百五十步嘉定元年宜興丞趙彥摺又立祠於安國寺東見圖經後祠廢列其像於雙仁祠明嘉靖二十八年縣令高尚志移祀鎮海門外今廢

古彭烏廟

在教場祀元勅封護國佑民永固土地

彭文驥烏守忠康熙五十九年從祀尖山潮神廟

雍正九年從祀海神廟

彭烏廟 在春熙門外七里海塘上亦祀彭烏二神

衢州府知府白豐碑記雍正三年余奉委修築海塘往來塘工去寧邑東七里有廟曰彭烏詢祀何神土人爲余言一姓彭諱文驥字德公一姓烏諱守忠字子樸世同里閭家素封元泰定三年海溢朝命築塘費不給二神罄家貲助之坍塌不已時有遷民內地之議神曰生不助其成死必捍其患何內徙爲未幾陷于海大顯靈異海患頓息塘成而民卒不徙聞于朝立廟以祀明嘉靖三十年塘大圯神又顯靈勅封護國佑民永固土地明王至國朝康熙三年憲副黃岡熊公督理塘務感異夢遂捐俸修葺三十七年邑罕王任以海患躋廟齋祝不逾時海即漲沙督撫具題奉

勅同諸海神建廟尖山之陽其七里海塘及教場二廟仍聽土俗奉祀

鎮海塔

海寧縣志舊名占鼇在邑治巽隅萬歷間

邑令郭一輪經始築基一級有奇後令陳揚明議  
竟舊令之緒會嵯直指張惟任司理孫穀廉得施  
金所贏者一千兩昇揚明襄厥事萬歷四十年壬  
子正月鳩工九月告成其高一百五十尺廣周九  
十有六尺圍廊翼欄達七級之頂明末邑人陳內  
翰之遜孝廉之暹重修後復傾圯康熙丙辰秋邑  
令許三禮鳩工重葺邑人都御史陳鼓永撰記

嘉興府

海鹽縣

海神廟

海鹽縣圖經

亦名龍王廟永樂三年左通

政趙居任築海鹽塘成建景泰六年僉事陳永叅  
政謝輔重建於東門外海上

楊公祠

海鹽縣圖經

楊憲使瑄築塘有功既卒民

祀之東門海塘上與龍王廟並萬歷七年巡撫徐  
棖疏請移建二廟於白洋河上歲春秋及八月十

八日有司致祭

陳詒揚公報功祠記公諱瑄字廷獻江西豐城人舉景泰進士試御

史再疏曹石之奸誦成嶺表茂陵即位復公官陞  
浙江按察司憲副巡視海道癸巳甲午風潮大作  
乙未丙申繼之塘大圯公篤意籌畫定海城北擇  
海塘縣西走馬堤郭衢所裏外海塘健跳所海鹽

海塘皆公修築海鹽塘踰二千三百丈工最鉅捍  
患最大隨陞按察使司半載病亟語寮案倦倦惟  
築海塘法不及私鹽民戴公德肖公像祀之海濱  
萬歷乙亥之變祠宇漂沒而公神像泊二三侍衛  
自移百步外踞高曠間儼如廟貌土人異之余自  
奉命綜理塘務巡海上訪公政績率有司謁公禱  
以默相比予督石桐江公白晝見夢授以修築之  
法出人意料塘既完白之撫院疏請建廟賜額蒙  
旨名報功祠有司春秋致祭遂於白洋河內擇高  
爽善地負城面海創建神宇設以几筵侍以衛從  
環以垣牆區以勅旨永鎮洪波與海神埒夫公直  
聲在朝廷勲名在史冊區區一祀胡能重公顧萬  
頃溟渤一線隄防自非藉公精誠孰克鎮定遐思  
美報百代不磨宜矣然余復有感焉邇偕少府張  
君增修前績而張君內倣縱橫樣塘外倣荆公陂  
塘堅鞏可久覆之往牒鹽之有荆公陂塘自公始  
也其有縱橫樣塘自葵峰黃公始今第修二公之  
業兼而用之績以罕儷今公入祀典而黃未叅一



豆人心飲焉矧丈尺段分次第字號迄今皆遵黃公法視公屬續惓惓良亦無忝晉祀何疑余雅意欲請於朝凡捍災禦患法施民勞定國一言一事苟合祀典皆乞侑食廡間用勸來者而黃公爲急乃匆匆滇南之行未果也書以識之蓋亦公所許矣

三公祠

海鹽縣圖經祀僉憲晉江陳公詔郡丞弋

陽黃公清縣令進賢饒公廷錫並萬歷七年築塘有功在楊公祠旁

黃道廟

海鹽縣圖經一在縣西南四十里鸕鷀湖

上一在澈浦鎮黃道山上宋志長牆山之阿有黃道神祠初在石帆村因陷於海建炎二年僧若中

遷之山寶慶三年都運諸大卿奏請廟額稱顯應  
侯廟廟中有神曰楊太尉尤靈客舟渡海必禱之  
續澈水志顯應侯廟在龍眼潭之上宋時番舶皆  
聚於此廟神甚靈自禁海之後潭湮塞爲平沙不  
復可泊廟廢爲荒基者二百年嘉靖癸丑倭奴入  
犯叅將盧鏜以舟師守澈方患無所灣泊有一卒  
登巖伐廟前柏爲舵幹神忽憑之言曰汝敢伐吾  
柏耶盧異焉乃祀之議剏新祠令揮使徐行健董  
役越月祠成俄而潮衝沙磧內徙里餘龍眼潭復

故迹古岸宛然測之無底戰艦畢集祠下矣其異如此

金山顯忠行廟

海鹽縣圖經祀漢大將軍霍光永

樂志云一在縣東北九十里廣陳鎮元至大二年建一在縣東北五十五里當湖市宋建炎三年建今並析屬平湖縣矣本縣行廟在東關外一里海上宋宣和六年建紹熙中縣令李直養重修

海寧衛聖妃廟

海鹽縣圖經在縣西北二百五十

步十字街北洪武二十九年建成化嘉靖萬歷等

年並重修

澈浦聖妃宮

海鹽縣圖經舊設南門外操備廠前

天順初移門內大街匾額摹張即之書

平湖縣

顯忠廟

嘉興府圖記在縣治東一里當湖旁祀漢

大將軍霍光

魯詹顯忠廟碑記大觀庚寅冬詹廣陵秩滿臘中歸省親道經吳江寒甚

一夕震澤冰合既抵家鄉人皆言曰昔湖中冰厚

幾尺有物自東北趨西南轟然有聲水辟如粉夕

即還如是三日乃已此何異耶詹曰異哉不得而

知之第聞吳主孫皓當被疾時有神降於小黃門

云華亭鹹塘風濤為害非人力能防古海鹽縣一

旦陷為湖無大神護臣漢之功臣霍光也臣部黨

有力當鎮之可安翊日疾瘳立廟小金山鄉人盡  
相與築宮湖上竭虔昭惠以鎮此土乎僉曰茲衆  
所祈嚮者即卜爽闔之地占湖山之勝乃營廟宇  
乃嚴神棲自是遠近翕然結社會拜者舳鱣相御  
也竊嘗謂生為偉人則歿為明神必有大力德於  
民隨其所向而追想世奉祀之惟忠烈公策名孝  
武擁昭立宣厥功懋焉是時漢都長安距吳會遠  
甚公之歿更兩漢歷三國已數百年乃托吳主之  
疾肇建金山之祠敷錫陰貺宏庇海邦此何理耶  
其神如月在天有水則現舟行月移東西南北隨  
所向而見之若黃石公之於仙舟張漁陽之於鄮  
邑民猶尸祝之矧夫忠烈巖巖精爽凜凜發祥炳  
靈感應如響曾何久且遠之間耶時愈久而民之  
祀愈崇詎容議哉我宋重熙百神受職宣和二年  
始賜額曰顯忠後三年誥封忠烈公雖冠五等之  
爵尚遲顯忠之令庶致崇樞而移神貺也丙午春  
詹歸自京師祗凝祠下至未就緒慨歎久之而職  
其事者輿議弗允亟告縣大夫而易之明年冬闔

郡司還朝過家上冢乃見廟宇屹然擁以虛亭翼以修廊旁列攸司各有次第高明輪奐庭植暈飛徘徊諦觀目駭而心肅焉因哀始末書之石式告來者沈懋孝重建顯忠祠碑記顯忠祠在當湖東門外相傳爲鎮海神以乍浦地界金山海濤從波上流來故亦稱金山之神其小像作負宸狀如漢武所賜大將軍博陸侯之圖則余聞之先大父言自番舶入貢顯靈海濤間而尊置之者其在三國吳王時夢感小黃門稱鹹塘鰲作非人力可防余漢之博陸侯也奉帝之勅率所部作鎮鹽官至晉代因武原縣治一朝忽沉爲當湖始立祠湖之上宋大觀中兩浙提舉魯詹感其靈應請于朝始封忠烈公宣和二年賜額爲顯忠祠紹興中知湖州魯可封是詹之子勒石紀其事始末如此云本朝載在邑乘早乾水溢禱之輒應至嘉靖中海寇徐海陳東葉麻三酋者窟穴松江之柘林無月不掠我湖邑先後七八年督撫績溪胡公宗憲臨鎮湖邑解攜其黨盡殲三酋之衆於我沈家莊是時金

山神明効靈爽督撫公如將見之親致祭焉始公  
先受降渠酋繼有逆謀復檄永順麻沙諸部蕩平  
之蓋島氛濁厲終始結局於此邦明神佑助之功  
焉可誣也余時總中爲諸生日夜編于垣埤枹鼓  
間一一親見其事如癸丑三月倭千餘從乍浦登  
岸蟻結于讀書堆上者五日彼時未有城堞市人  
揭竿湖畔以禦之此一帶水耳終不能渡取道竟  
從金山去後有田父數人被拘逸還者言彼中見  
有金冠金袍白馬翩翩巡湖之游戈戟如雪或作  
虎象形嗚呼無城無兵何恃能守此非神之力而  
何也如乙卯二月倭駕千艘萬人來攻城其酋乘  
輿先上流矢向城中者如雨邑侯襄陽劉公存義  
連發三矢酋遂殪放艘由武塘以去後有從艘中  
脫歸者競言酋見神人仗劍擊之諸艘檣纜多折  
斷者以爲不利吐舌連宵遁嗚呼咆吼而來奪魄  
以去此又非神之力而何也自倭熄來今且五十  
餘年海波安瀾時和歲登我父母延陵王公加意  
乎境內應祀之神於是父老同聲願新顯忠神之

祀呈舉帖行樂趨者衆故工力速成規模開拓於  
舊余爲述明神之顯聲濯靈於耳目間者真實如  
是使邑士民皆敬焉夫湖邑僅百里而去海甚近  
島汎無期颶災時作斯時也有邊海之防焉有蕩  
析之慮焉天人幽明間所爲協奠此土者功參半  
矣乃若子孟先生受遺擁立持傾保大事在前史  
堂堂巍巍神行天壤無所不在 閩人英烈錢侯附  
吾聞其事今天下未見其人

馬

趙孟堅顯忠廟英烈錢侯碑記吳國備史載漢  
博陸侯霍公附小黃門謂吳主曰國之疆土東

鬻海濤虧蝕侵尋臣漢舊輔今當爲臣駐小金山  
爲禦海斥使不衝盪全護國封當爲建祠于彼全  
山示所旌顯自時厥後封祀不絕今爲忠烈王顯  
濟廟焉維英烈侯家閩氏錢行位居七航海而商  
舶帆經從入廟致禮儼觀威爽虐浪東行一山若  
岸巖巖殿宇卓冠山椒地勢坤靈軒赫斯稱又諗  
王忠存漢社稷歆生敬慕若曰浮沉罔利軫轉迷  
途汨渙塵中何終底止歿事忠臣愈浪生死猛念



倏發幽明洞符玉立廡間义手瞻視不歆不倚窅然化歸異哉於是驚怪顯迹塑貌附祀老宿相傳幾百年矣季夏之月二十二日維侯生辰沿海祭祀在在加謹廣陳鎮金山祠祀尤嚴常歲是日海商海賈寨戶亭丁社鼓喧迎香華羅供然前無位號未應秩經仗隊弓刀遙稱太尉殆幾野廟殊闕聲猷屬青齊向化之年困獸猶競東鄙興師侯能助順虛無之際神證用彰霧消雲飛陰兵千萬排空而下旌旗著號華亭太尉智識昭明逮及交鋒賊勢披靡風驅電掃冥助維多主兵上之公朝訪尋允合爰加封勅謚以英烈庸荅靈休端笏垂紳榮披章服從飾仗衛一變魚雅孟堅母弟孟淳今嗣秀安僖王曾元孫翼居里日嘗誦言曰英烈神靈國勲如是其偉兄志于文盍爲紀述其永聲聞當備樂石以奉刻詞茲海鹽縣圖經宋建炎三年以書石既訖紀弗可後

將仕郎曾壽淵宣教郎致仕賜緋魚袋曾壽寧建

天后宮

平湖縣志

在乍浦苦竹山宮右有觀濤閣

明天啟七年過京兆庭訓建樓五間背山面海華  
亭董其昌有跨鯉觀濤之額今改建平房匾額猶  
存又一處在東門內